

NÓTAÍ MÍNIÚCHÁIN

1. **Bonn leis na figiúirí**

Na figiúirí a thaispeántar i leith fáltas agus caiteachais in 2004, is aschuir réamh-mheasta iad agus cuireann siad in iúl an t-eolas atá ann faoi láthair. Tá siad faoi réir leasuithe nuair a bheidh figiúirí dheireadh na bliana ar fáil. Beidh sonraí lán-iniúchta do 2004 ar fáil sna *Cuntais Airgeadais 2004* agus sna *Cuntais Leithghabhála 2004* a fhoilseofar faoi 30 Meán Fómhair 2005 ar a dhéanaí.

2. **Ioncam**

Tá an meastachán ioncaim do 2005 bunaithe ar na forálacha cánach atá i bhfeidhm anois.

3. **Caiteachas**

Ar 18 Samhain 2004 foilsíodh *Meastacháin le haghaidh Seirbhísí Poiblí (Leagan Coimrithe) agus Ghearrchlár Caipitil Poiblí 2005* (IMC). Na figiúirí do 2005 atá sa doiciméad seo, is ionann iad agus na figiúirí a foilsíodh san IMC. Tá figiúirí réamh-mheasta an aschuir do 2004 ag teacht leis na figiúirí a foilsíodh san IMC, agus is figiúirí sealadacha iad faoi mar a chuir Ranna agus Oifigí iad in iúl. Beidh figiúirí eisiúintí dheireadh na bliana ar fáil go luath in Eanáir 2005.

4. **Leithghabhálacha-i-gCabhair**

Taispeántar caiteachas vótáilte glan ar Leithghabhálacha-i-gCabhair. Is fáltais iad, ar féidir le Roinn nó le hOifig iad a choinneáil, le toiliú na Dála, lena n-úsáid le haghaidh caiteachais in áit iad a íoc isteach i gCuntas Státhiste an Lárchiste. Tá sonraí caiteachais chomhláin vótáilte Ranna in **IMC 2005**.

5. **ASPC**

Íoctar ranníocaíochtaí ASPC isteach sa Chiste Árachais Shóisialaigh (CÁS), agus ní cuid iad den ioncam a íoctar isteach sa Lárchiste, mar a mhínítear sna paragraif a leanas:

Na híocaíochtaí amach a dhéanann an Roinn Gnóthaí Sóisialacha agus Teaghlaigh, baineann siad le trí phríomhchatagóir, is é sin,

- (a) íocaíochtaí as an CÁS a bhaineann le teidlíocht daoine faoina dtaifead árachais / ASPC / sochair, e.g. sochar dífhostaíochta, pinsin ranníocaíocha, etc.,
- (b) íocaíochtaí le daoine nach bhfuil cáilithe feasta nó nach raibh cáilithe riamh faoina dtaifead árachais/ASPC/sochair le híocaíocht a fháil as an CÁS, e.g. cúnamh dífhostaíochta, pinsin neamh-ranníocacha, etc., agus
- (c) íocaíochtaí ar nós deontas d'eagraíochtaí.

An méid a vótáilte an Dáil don Roinn Gnóthaí Sóisialacha agus Teaghlaigh, is comhdhéanamh é d'íocaíochtaí faoi réir (b) agus (c) thuas, i dteannta le haon suim a bhíonn de dhíth ar an CÁS más lú acmhainní an Chiste ná an tsuim iomlán atá lena hÍoc as an gCiste in aon bhliain amháin.

I mblianta roimhe seo, ba ghá ranníocaíocht Státhiste chun an gannchion ar an CÁS a chúiteamh. Ach ó 1997 i leith níor ghá ranníocaíocht ón Státhiste.

6. Réamh-mhaoiniú dliteanais phinsin san am atá romhainn

San Acht um Chúlchiste Náisiúnta Pinsean 2000 tá socrú go ndéanfar cuid den chostas amach anseo ar phinsin leasa shóisialaigh agus ar phinsin seirbhíse poiblí a réamh-mhaoiniú, agus le 1% den Olltáirgeacht Náisiúnta (OTN) a chur ar leataobh gach bliain chun na críche seo (féach Nóta 7 ar leathanach F. 9).

7. Leithdháiltí Caipitil Tugtha Ar Aghaidh

Faoi réir Alt 91 den Acht Airgeadais 2004, is féidir le Ranna agus Oifigí caipiteal neamhchaite d'oiread suas go 10% dá gcaiteachas caipitil vótáilte a thabhairt ar aghaidh go dtí an bhliain dár gcionn. In aschur tuartha 2004 áirítear méid de €248 milliún a eiseofar as an Státhchiste agus a chuirfear do shochar i gCuntas an Phámháistir Ghinearálta do gach Roinn atá i gceist lena chaitheamh in 2005. Léireoidh an t-aschur sealadach in Imleabhar na Meastachán Leasaithe 2005 an caiteachas iarbhír.

8. Comhardú Rialtais Ghinearálta

Maidir leis an aschur réamh-mheasta ar an gComhardú Rialtais Ghinearálta (CRG) in 2004, is barrachas de €1,356 milliún nó 0.9% den OTI atá ann. An réamhfhaisnéis roimh an mBuiséad ar CRG do 2005, thuar sé barrachas de €318 milliún nó 0.2% den OTI (féach leathanach F. 5). Tá sé seo ag teacht leis an gComhardú Státhchiste a fhoilsítear sa mheamram seo.

Is sainmhíniú níos leithne ar Rialtas é an téarma Rialtas Ghinearálta mar le cois an Státhchiste cuimsíonn sé na hÚdaráis Áitiúla, an Ciste Árachais Shóisialaigh, na comhlachtaí Stáit Neamhthráchtála agus an Cúlchiste Náisiúnta Pinsean. Mar sin, nuair a dhéantar íocaíocht as an Státhchiste don Chúlchiste Náisiúnta Pinsean, ní athraítear an Comhardú Rialtais Ghinearálta.

Socraíonn Eurostat (Oifig Staidrimh an Aontais Eorpaigh) conas a chinntear na míreanna a cháilíonn faoi rialacha an CRG.

9. Leagan Gaeilge

Tá an doiciméad seo á fhoilsiú i nGaeilge agus i mBéarla. Tá an leagan Gaeilge le fáil ar shuíomh gréasáin na Roinne Airgeadais www.finance.gov.ie. I gcás aon difríocht idir na leaganacha sa dá theanga, cinnteoidh an Roinn Airgeadais an bhrí cheart atá i gceist agus ní bheidh aon dul thar an gcinntiú sin.